



清刻龍藏佛說法變相圖

二經同卷

善七

佛說波斯匿王太后崩塵土全身經

須摩提女經

佛說波斯匿王太后崩塵土全身經

善七

西晉三藏法師法炬譯

聞如是一時婆伽婆在舍衛城祇樹給孤獨園爾時拘婆羅國波斯匿王太后崩時年百歲老無壯勢精進修善法時波斯匿王供殯送母日正中還塵土全身步往詣園至世尊所頭面禮足在一面坐時世尊問王言今王何故塵土全身步來至我所時波斯匿王便涕泣不能自勝揮淚白世尊言太后崩世尊太后無常如來年在期願無少壯力積修善

法甚戀痛念夙夜孝養未曾違忘命可贖者
世殞身壽若象馬車乘贖命可得者盡當持
贖以人民衆贖命可得者亦當持贖莫使我
母命過若以金銀贖命可得者亦當持贖若
以珍寶贖命可得者亦當持贖若以金銀珍
寶贖命可得者亦當持金銀珍寶贖命若以
奴贖命可得者亦當持奴贖命若以婢贖命
可得者亦當持婢贖命若以奴婢贖命可得
者亦當持奴婢贖命若以村落贖命可得者
亦當以村落贖命若以城郭贖命可得者亦
當以城郭贖命若以村落城郭贖命可得者
亦當以城郭村落贖命若以一方贖命可得
者亦當以一方贖命若以土地人民贖命可
得者亦當以土地人民贖命若以人民一方
贖命可得者亦當以人民一方贖命莫使我

母命過爾時世尊告波斯匿王言如是大王
如王所說若以白象贖命可得者便可以象
贖母命若以馬車人民珍寶金銀奴婢村落
城郭一方人民贖母命可得者便當以一方
人民贖母命莫使我母命過是故大王當思
惟無常想當廣布無常想當廣布是想爾時
世尊便說偈言

善七

二

一切人歸死 無有不死者 隨行種殃福
自獲善惡業 地獄爲惡行 善者必生天
明慧能分別 唯福能遏惡

如是大王有四恐懼大恐懼無能避者亦不
可以刀杖避呪術藥草象馬車乘人民珍寶
金銀奴婢村落城郭一方人民珍寶金銀奴
婢村落城郭一方人民云何爲四老爲大恐
畏肌肉消盡不可以刀杖避乃至一方人民

皆無能避病爲大恐懼無強健志不可以刀杖避乃至一方人民死爲大恐懼盡無有壽不可以刀杖避乃至一方人民恩愛別離爲大恐懼不可以刀杖避乃至一方人民是謂大王有此四大恐懼不可以刀杖避呪術藥

草象馬車乘人民珍寶金銀奴婢村落城郭一方人民珍寶金銀奴婢村落城郭一方人民譬如大王有大雲起雷電霹靂斯須還散亦不久停如是大王人命極短壽極百歲其中出者亦少耳譬如大王有四大山石無有空缺四山皆等一時相磨樹木藥草不可以刀杖避如是大王有四大恐懼至不可得避云何爲四老爲大患肌肉消盡不可以刀杖避藥草呪術而得避者病爲大患無強健志死爲大患身心永滅恩愛別離爲大患不

可以刀杖避呪術藥草而得避者大王廣修無常想廣布無常想所以然者已修無常想當布無常想盡斷一切欲愛盡斷一切色愛盡斷一切無色愛一切無明盡斷此間所有愛亦斷譬如大王草葉積薪積以火往燒大叢林若臺閣舍此亦如是若修無常想廣布無常想盡斷欲愛盡斷色愛盡斷無色愛盡斷無明盡斷此間所有愛是故大王當以正法治化莫以非法治化如是大王當作是學爾時波斯匿王白世尊言此法名何等當云何奉持世尊告曰名除憂患經此法除去憂患時波斯匿王白世尊言如是世尊除憂患經如是世尊除憂患經所以然者我聞此法已世尊所有戀慕愁憂皆悉除盡自覺身體柔軟歡喜爾時世尊與王波斯匿具說微妙

法勸令歡喜時波斯匿王即從座起頭面禮
足遶佛三匝而去爾時拘婆羅國波斯匿王
聞佛所說歡喜奉行

佛說波斯匿王太后崩塵土全身經